

1 Píta

Ebeq sáhnsahwe ahtebé ehwehne.

Sísa tagaríáh ké mó mapéq mó mapérue abae aguwana Píta mi keyábé iwíáhéna mah pahsí sehiranúwe. Mah ebéqté páhsípéq sehiranéna, Íre kaweq sunúq iteba sínaraq Síssane sánsá ambubu atawéq kawerue sehgióro. Sísa tagaríáh kéréq wahnahno kegá mi keyábé arutaboírue pehwehrue wahnahnarítáthro. Manikánka píribahri ke íre séhréhia peh ahqáho arítéhre. Owainawansabé anotahta q ahqáho atáthro ue sehiranúwe. Sísa tagaríáh ké gá wene sánsá kawerue sehgihehéna Píta mah pahsí sehiranúwe.

Píta ebeq sehiranú pahsíe.

1 ¹Íné Pítane páhsi sáhnsahwe tagahro. Sísa Karáhéga íné omaq intena eqmaq nuwowe. Ite Sísa tagaríáh ké méq Asiu ke méq wáhnaupéqté kéné marakórapeq mía mía ke wóe. Ite Póntúsa marakórápéq Kárétia marakórápéq Kápárosía marakórápéq Esia marakórápéq Pítínia marakórápéq mía míaowe.

²Maniká Iteriboga iwíáhue ite omaq itowana Sísa Karáhéga wene korahqtaté itene irupipeq kaweraitáráire. Kaweraitáráirana wene ehweh sehgieq wene kaweq anímári míagehehéna Manikáne Awanka séhréh aitéhre. Maniká Iteriboga itene iru ukiq itena anotahta q séhréh aitéhre.

Íópeq oga mérapeqsábé áwénuné ehwehne.

³Itene Wahnah Sísa Karáhéne Abowá, itene Manikánsabe iwíáh íwíáh atone. Manikánka itensabé anotah arútábóiri puana Sísa Karáhé pukúwana iriwe oganúq atotaq ite moq oganúq itowe. Minayabe ite oga mía míaoneheqmúne íwíáhúne. ⁴Íópeq pokona tanáhráq Maniká Iteriboga omaq itena áhnte kaweq naneqmarí náinkéhe. Wegá mi naneqmarí íópeq sáharéhra na mitaq íre kambarékia peh kaweqta q kagaire. Minawari awaq meyabe itene iru eyoyóue áwénunúne. ⁵Itega Síssansabé aiq pútare atona puana Manikánka amahnága págegeue wahnahnaitahna q mókake kaweqtapéq awaq mianéhe. Anehe tanáhráq Manikánka ite airaiq kaweraitahna tanáhráqsábé áwénunúne.

⁶Mókake ite airaiq kaweritahnayabé iru eyoyóue míáhwe. Amahnága pehgáriq tanáhráq íre kaweq sunúqká ite áhwárawe tagéna kamah aíre. ⁷Minayabe íre kaweq sunúq iteba sínaraq itega Sísane sánsá ambubu atawéq peh kawerue sehگیرataqmé minawé kaweq sansáne.

Minawé wehukega ebah moné mirao sansá tahnsane. Móne mirao naneq ebáh áwíq kórae. Wehukega mi ebáh kaweraraneheéra iraipéq parearáhwana abehq náneq tagirana anehe peh kaweq koráwé kéhre. Itega Sísansabé kawerue aiq pútare atáhnká mi kawéq ébáh kiotaiqme peh kagaire. Kórawe íre kagaorahi nanere. Íre kaweq sunúqká áhwárawe tagáhnaraq itega Sísane sánsá ambubu atawéq peh kawerue sehگیرataq mókake Sísá Karáhéga tuinagake itensabé, Kawerowe éna anotah anímári míáhro aitankéhe.

⁸Itene iuranka Sísá íre tagéq pehipi wensabé irutaborowe. Amahnága itene iuranka Sísá íre tagia pehipi wensabé aiq pútare ateq anotahtaq iru eyoyóue iwíáh íwíáhowe. Iru eyoyóinsabé irareyabe itene ehweh íre awehraq kéhre. ⁹Itega Sísansabé aiq pútare atáh púana Manikánka iteiuwa kaweritéhre.

¹⁰Manikáne Awanka sokigi ariu ehweh pahsuq pahsuro kégá ite kaweritéhra ehwéh naho iraruwe. Iraréra, Wega árahue kaweraitehrámo íwíáhéra áwahe kabaréra kasenuwe. ¹¹Sísá Karáhéne Awanka iwíáh aritowara sega Karáhé éhweh iraréra we érinana anehe anotah aní úkína ehwéh iraruwe. Iraréra, Ite meirahna anínká aneq tanáhráq tuinabomo? Mi tanáhráq aneq ábórarinabomo iwíáhéra,

¹²Itega irarúna ehwéhme íre ite oga mé tanáhráq peh mó tanáhráq aiq pútaragínara mó kegá tagagehe uwe. Naho sega aiq pútaq ehwéh iraréra sehiranurowaq itega amahnága írátíáhwe. Manikánka Wenawa íópeqté eqmaréhra kaweq ehwéh tei teino ke págege aritéhrara aiq pútaq ehwéh tei teinowe. Mah ehwéh íópeqté kégá moq ahtebéyabe suwahbehre.

Manikánka ite kaweqtaq míageheéna omaq itéh éhwéhne.

¹³Minayabe itewe tábúsoqme iwíáhue kaweq sansánoro. Sísá Karáhéga tuina tanáhráq anotahtaq séhréh aitankéhe. Minayabe iwíáhue áwénunoro. ¹⁴Ite múguwahguue míarotaq itene ahbabáq iwíáhga saiqnariaraire. Amahnága mi ahbabáq íwíáh sueq ¹⁵Manikáne animári míáh púaq wene sánsá kawerue sehگیرó. Ite omaq itéh aní ahriahri kaweqtaq mía míainserah ite moq kaweqtaq méq moke mirao sansá kaweq sansánoro. ¹⁶Minayabe Manikáne ehwehnka aiq mahraréna, Íné kaweqtaq mía míau puaq ite moq kaweqtaq mía míaoro ire.

(Wok Pris 11.44-45)

Manikánka anotah apéqtaté ite paiqmaro ehwéhne.

¹⁷Itega Manikánsabe, Iteriboe atahwe. Wega peh morá íwíáhue ómi wehukene arambehri agehgaqme tagéna sainsúéhre. Minayabe itega mah

marákóipéq míáh tánáhráq wensabé áhtenoro. ¹⁸Itega itene igaqnaréhne abehq sánsá sehgironka saiqnariowe. Manikánka anotah apéqtáté paiqmaronka saiqnariomé sabiruowe. Ite aiq tagariáhmé móneakáq ménsámehnsánkakaq abehq úkorahi naneq puana wega minarate íre paiqmarowe. Írakaumo. ¹⁹Sísa Karáhéga itene ahbabáqsabe pukúwana Manikánka Sísa kawe q koráhtáté ite sabiruanieéna paiqmarowe. Sísa awaho sipísipíq áráh q tahnsa ména itene ahbabáqsabe pukúwe.^a

²⁰Manikánka mah marákó márákó íre mirarotaq ite meirankeheéna Sísa omaq atowe. Ite séhréh aitankeheéna marakóipeq ábóraraginkehe úwana ábórarúwe. ²¹Wega ite séhréh aitaráinsabé Manikánsabe aiq pútare atáhwé. Sísa pukútaq Manikánka iriwe oganúq atena wensabé, Anotah aní míahno atowe. Miraúnsabe itega Manikánsabe aiq pútare ateq wene omasa éhwéh moke mirainkéhe íwíáhéq minayabe áwénunowe.

Sísa tagariáh keyábé kawerue irutaboirono i ehwéhne.

²²Itega aiq pútaq ehwéh ireq kawerue sehgirosabé kaweqtaq míahwe. Kaweqtaq méq mó Sísa tagariáh keyábé kawerue irutaboirono. Sensabé pehgáriqtaq irutaboiriye hboq anotahta q irutaboirono. ²³Manikáne ehwehme oganúq itahráhi ehwéhneéna ahriahri kagainawire. Itega mi ehwéh ireq aiq pútare atáh púana Manikánka irupipeq o awá maqitáráire. Iteiuwa íre pukorahiraq peh ahriahri mía míaoneheqmóe. Manikáne ehweh kagainsabé ²⁴wene ehwehnka mahraréna,

Mah kehiná kéhíná peh wahto tanahráq mah marákóipéq míahwe.

Se uworapeqté náneq tahnsá míahwe. Segá iwíáh íwíáho naneqme peh uworapeqté wéhgánáh ára tahnsáne. Uworapeq kíréh náneq eh yatagirana árame pururuqnagire. ²⁵Itene Wahnahne ehweh mina tahnsa íre miraia peh ahriahri kagainawire ire.

(Aisaia 40.6-8)

Mah ehwéhme aiq tei teino kaweq ehwéhne.

Ite sunkíkírabeqte meiqmena téhrehrabeq móito ehwéhne.

2 ¹Manikánka o awá maqitárái puaq moke íre kaweq sansá súáhro. Péhe éhwéh irareme, moke péhe sánsámé, mó kené ménsámehnsánsabe igará pabekime, éhruru ehwéhme, mi sansámári moke súáhro. ²Inahunah anínká náhnsabe arutaboirena nehnserah Manikáne ehwehnsabé irutaboirono. Itega mi ehwéh ireq sehgírataq

^a **1.19** Manikánka sene ahbabáqsabe kaweraritankeheéna Ísara kegá sipísipíqtaté Maniká titiratówe. Awahreéna soriqnahnú sipísipíq íre subisa peh awaho mío sipísipíqtaté titiruwe. Wok Pris 22.17-25 tagáho. Pítaga mi sansá iwíáhéna, Sísa awaho sipísipíq áráh q tahnsa méhre ue sehiranúwe.

págegeue míahrahowe. ³Minayabe itene Wahnahnka kaweraitéhmé ahtebeq iwíáh íwíáhowe.

⁴Sísa itene Wahnah oga mía mía wahq tahnsa míre. Weba sero. Áhnte kegá wensabé, Iuwahriehre atówana Manikánka wensabé, Are omaq atóge éna, Arega moke mó ke kiotaikóna aní móné úwe. ⁵We itene oga mía mía wahq tahnsaniraq weba séq wene nahwiahnsanse tahnsá míagehe. Minayabe Maniká Iteriboga mi nahwíáhnsánséráté wene nah pearankéhe. Ite mitaq Manikáne mibeq mahbeq aritáh ké méq Sísa Karáhéga miraúnsabe Manikánsabe kaweróne ateq wensabé iwíáh íwíáh ataneheqmóe.

⁶Minayabe Manikáne ehwehnka aiq mahraréna,
Írátíáhro. Sáióna sawéhrápéq néne nah pearaníe. Omaq ato anínká
mitaq kaweq wahq táhnsá míankehe.^b Wensabé aiq pútare atáh
kégá anehe íre siyehitanawire ire. *(Aisaia 28.16)*

⁷Wensabé aiq pútare atáh kégá, We anotah kawéq áníne íwíáhowe.
Wensabé íre aiq pútare atáh keyábé Manikáne ehwehnka mó mahraréna,
Nah píáh kégá suto wahqká moke nahwiahnsanse kiotaikire ire.
(Buk Song 118.22)

⁸Manikáne ehwehnka mó mahraréna,
Mi wahqmé wehuke siyobeq patame inahnsuoráhowe. Wehukega
wahqtáq siyobeq patame surahoneherawoe ire. *(Aisaia 8.14-15)*
Wahqtaq siyobeq patame inahnsuónserah Manikáne ehwehnsabé
iuwahriehre e kewé ahabárowe. Naho Manikánka iwíáhéna, Mókake mi
kegá néne ehwehnsabé suwahríáhnaraq ahabárigéhe úwe.

⁹Itewe mina tahnsa íre owe. Manikáne kaweq animárí wenkahnáh
míageheéna omaq itowe. Itene Wahnahne mibeq mahbeq aritáh
ké míageheéna ite omaq itowe. Wega séhréh aitéh árámbehrí teri
terinigeheéna ite omaq itowe. Menah ite sunkíkírirabeq míarowana
Manikánka itensabé, Máhoru urairaq itega mitaq sueq wene kaweq
téhrerebeq kowíarowe. ¹⁰Menah íre kaweq ke méq amahnága ite
Manikáne animárí míáhwe. Menah wega kamah aieráhuraire. Amahnága
wene animárí míáhnsabé íre kamah ainkéhe.

Peh kaweq sansá sehgionehqmúne i ehwéhne.

¹¹Néne iyahnabo animáríno, néne ehweh teiníboq kawerue íráhro. Ite
wáhnaupéqté ké suwahpeq tahnsá míáhtáq sene ahabábáq íre sehgiówe.
Mina onserah itene irupipeqté áhbábábáq íwíáhgá iteiuwa áugi ínehoéq
íre sehgira peh ahqáho atáhro. ¹²Sísa íre tagaríáh ké míáhrabeq
tábúsoqme sansánéq kaweqtaq mía míaoro. Segá itensabé, Ahabábáq
ke woe aitéhrataq itene kaweq sansá tagéra mó iwíáhéra itensabé, Peh

^b 2.6 Kárfki ehwéhmé íre wahqtaq pabeqme peh ebahtaq pabeqme ehwéh mirarire.

kaweq sansáno ke wóe aitagéhe. Mira íwíáhirataq Sísa tuinagake sega Manikánsabe iwíáh iwíáh atagéhe.

Wahnahno kené ehweh íráhro i ehwéhne.

¹³Itene íopeqté Wáhnáhnsábé iwíáhéq mah marákóipéq wahnahno kené ehweh íráhro. Kámáhni wahnáh ánínseq wega eqmaréh wáhnáh kéreqne ehweh íráhro. ¹⁴Kámáhni kegá ahbabáq ke kamah ariera kaweq sansáno keyábé, Kawerowe arítáhwe. ¹⁵Maniká awahbeh sansá sehgióro. Kaweq sansá sehgionka múguwahgu kené íéhruru ehwéh saiqnarugáhe.

¹⁶Umehga íre saiqnaríéh ké tahnsa míáhro. Mó naneqka ite íre saiqnaríéh púaq, Pehipi ahbabáronene iwíáhiyehboq Manikáne arambehrio ke míáhro. ¹⁷Moke ómiyabé iwíáh iwíáhoró. Sísa tagaríáh keyábé irutaboirono. Manikánsabe áhtenoro. Mah marákóipéqté wáhnáh keyábé iwíáh iwíáhoró.

Sísaga kaweq sansánúnserah itega moq miraoro i ehwéhne.

¹⁸Mó kené arambehri arítáh kéó, itene marakóipeqté wáhnáhnsábé iwíáh iwíáhéq wene ehweh kawerue íráhro. Íre peh morá kawerue séhréh aítáh wáhnáh kéné ehweh íráhro. Írakaumo. Págegeue wahnahno keyábé áhtenéq sene ehweh moq íráhro. ¹⁹Mó kegá kamah airaq kaweq sansánirataq Manikánka itensabé, Kawerowe aitankéhe. We awahbeh sansá mirao puana wega itensabé, Kawerowe aitankéhe. ²⁰Itega ahbabáriransabé mó kegá iubiqme kamah aírataq kawerowe íre aitahráhi mino. Kaweq sansánirara mó kegá kamah aírataq Manikánka itensabé, Kawerowe aitankéhe.

²¹Itega kaweq sansá miraigeheéna Manikánka omaq itowe. Sísa Karáhéga itene ahbabáqsabe putiotaq wene arupipeq umeh ague wene anonka éruwe. Wega kaweq sansánúnserah itega moq miraoro. ²²Sísaga íre ahbabáruwe. Wega péhe éhwéh íre irarúwe.

²³Sega we abehq éhwéh atótaq wega sensabé íre síwíwiowe. Segá we áwíóqnowana éruítaq wega sensabé, Mókake kamah ainauge íre irarúwe. Írakaumo. Manikánka tábúsoqme aghmarena sainsuanawire éna, Wega íné kawerue wahnahnaintankéhe iwíáhúwe.

²⁴Itene ahbabáq sansa sueq kaweqtaq mía míaigeheéna Sísa Karáhé awankátaq táhpawe pukútaq itene ahbabáqmari wene anonkataq moke meyowe. Sísane anonkataq purambura agúnka ite kaweraitowe.

²⁵Itewe sipisípiqka wene ah suena peh tanahraipéq móbuq mahbuq inserahnurowe. Amahnága itene Wahnahpa kouwekowana wega iteiuwa kawerue wahnahnaitéhre.

Weh ahreyabé éhwéhne.

3 ¹Ahrerono, iteruwehqsoné ehweh kawerue íráhro. Iteruwehqsonka Manikáne ehweh íre aiq pútare atéhrataq itene kaweq sansá

tagagehboq sene ehweh íráhro. Íre itega teríra ehwéhnsábé peh itega kaweq sansánira tagéra, Íné moq Sísa k éraníe íwíáhigehe. ²Iwíáhéra, Néne ahrega kaweqtaq mé sansáni púana, Íné moq Sísa k éraníe íwíáhigehe.

³Ahrerono, awahriq naneqsabé íre irutaboioro. Kaweq korósíyábé itene iyahra kaweré náneqsabé moke awahriq naneqsabé íre irutaboioro. Íre arene anonkataq awahriq naneqsabé ⁴peh morá itene irupipeqté kaweq iwíáhíyábé irutaboioro. Kaweq iwíáhirataq iru pehwehrue mía míaorahowe. Minawé Maniká awahbeh sansáne.

⁵Naho Manikánsabe aiq pútare atera wensabé iwíáh íwíáh ató ininsónká mi sansánéra sensuwehqšone ehweh írówe. ⁶Ébáráhmane ahre Sárähga wenawehqne ehweh sehgiena wensabé, Néne wahnah mone atowe. Ahrerono, itega kaweq sansánéq mó naneqsabé íre áhreirataq Sárähne ayahunkawa tahnsa míagehe.

⁷Weho, itene ahreronsábé iwíáhéq sereq kaweqtaq mía míaoro. Itereq itene ahreronseq oga mérapeq moráráq awaq miagéhe. Ahreroné sinonkame íre págege wehne sinonka tahnsáne. Minayabe itene ahreronsábé iwíáh íwíáhéq pehwehrue arítáhro. Mirairataq Manikánka itene púreq ehwéh irankéhe.

Ahriahri mó ke kaweq sansá aritanéhe i ehwéhne.

⁸Amahnága teiú éhwéhnikákákáq kawerue íráhro. Ite ómiga peh morá íwíáhoró. Moke Sísa tagaríáh keyábé irutaboiréq we séhréh atéhoró. Píríbahri iyehboq uwareša ké míáhro. ⁹Are ahabáratáhna aní ahabáratéhneho. Arensabé ehbonawi anínsábé íre kaweq ehwéh atéhneho. Ahabábáq sansa pehragé are ahabáratáhna anímé Manikánsabe, Séhréh ate kawerato ue púrerúno. Miraiageheéna Manikánka ite omaq itena íáhrabúwe. Itega mó ke séhréh ariteq kawerarítéhrataq Maniká Iteriboga itensabé, Kawerówe aitena séhréh aitankéhe. ¹⁰Minayabe Manikáne ehwehnka aiq mahraréna,

Oga méyabe irutaboiréq kaweqtaq méyabe irutaboiro keo, ahabábáq ehweh sueq péhe éhwéh íre teriéro. ¹¹Ahabábáq sansa sueq kaweq sansánoro. Peh morá íwíáhéq iru ukiq itahráhi sansánsábé irutaboiréq sehgióro. ¹²Itene Wahnahnka kaweqtaq mía míaó ke tagéna sega púrero ehwéh ahriahri irena peh ahabábáq sansano keyábé abiahnsa arítéhre ire. *(Buk Song 34.12-16)*

Kaweq sansánirataq iru eyoyóue míahrahi ehwéhne.

¹³Itega kaweq sansánsábé irutaboiréq sehgrátaq inseréhga kamah aigéhbo? ¹⁴Itega kaweq sansánirara mó kegá íwíoqnehrataq iru eyoyóue míáhro. Íwíoqnehra keyábé áhreéq itene irupipeq iwíáh kikiriyeho. Írakaumo. ¹⁵Itene irupipeq Sísa Karáhénsabe iwíáh íwíáhéq, We itene Wahnah mire íwíáhoró.

Mó kegá itensabé, Itega oga mía míaoneheq múne íwíáhóme aneqsabé mira íwíáhóo éra ahkakebopoq kasenigehe. Kasenirataqmé tábúsoqme terieneheéq íwíáhúe mi ehwéh kaweroro. ¹⁶Kaseno keyabé ehweh ayahqmarahnaq mi keyábé iwíáh iwíáhéq pehwehrue terio. Kaweq sansánúne iwíáhónehboq kaweqtaq mía míaoro. Kaweqtaq mía míaéq Sípane kaweq sansá sehgiónsábé mó kegá íéhruru aitéhrataq sega anehe iwíáhirame siyehitanae. ¹⁷Itega kaweq sansánúnaraq Manikánka kowe aritahnara mó kegá íwíoqnehrataq itega kaweq sansánúna puana aiq kawerire. Itega ahabábq sansánúnaraq mó kegá kamah aírataq ahabábq sansánúna puana íre kawerire.

Sísaga itene ahabábqsabe pukéna irigue oganúkú ehwehne.

¹⁸Sísa Karáhéga miraúnsabe iwíáho. We ahriahri kaweqtaq mía míaira q itewe íre kaweqtaq mía míaúne. Wega Manikánseq itereq insahwé aitanieéna peh morá tánáhráq itene ahabábqsabe pukúwe. We mónkakák íre pukinae. We pukútaq wene anonka pukúwana Wenawame íópeq peh oga míéhre. ¹⁹Oga ména pokue wene ehweh íre sehgiú kene siwamarí karábúsiipéq míótaq kosíwáhnorúwe.

²⁰Mi ke oga míótaq wehukení wenáwíq Nóah marakóipeq míowe. Nóah míótaq mi kené ahabábq áhnte agúwe. Áhnte agúwana Manikánka íre apubúue kamah ariuwe. Írakaumo. Peh síwénunúwe. Síwénunúwana Nóahga sípi aiq mirarowana anotah ibónsúnka mi ke wánínkuwe. Wánínkuwara peh Nóahreh karíronání abapete apahtáro ké méra sípiipéq kibekuwe. Kibekuwana wání piotaq íre pukia peh kaweqtaq míowe.

(Stat 6.1–7.24, 8.18)

²¹Pio wanímé píkísah tahnsáne. Itega mewéúna wanímé naho Nóah míótaq pio wání tahnsane. Íre itene inonkataté náwíq sorahruyabe wání meyone. Írakaumo. Ite wání meyonaraq iwíáhéq, Sísa Karáhé iriwe oganúkúnsabe ahriahri wene sánsá sehginauge íwíáhúne. ²²Sísa Karáhéga íópeq pokéna Maniká Iteribone ayah púpeq ména moke íópeqté kéreq mibeqté wáhnáh kéreq wahnahnaritéhre.

Itene irupeqte áhbábq iwíáh moke súáhro i ehwéhne.

4 ¹Sísa Karáhéne anonka éruataq wega iwíáhú serahnoro. Wene anonka éri anínká íre ahabábq aruqarurire. ²Wega mah marakóipéq míéh tánáhráq wene ahabábq iwíáh íre sehgiú. Írakaumo. Wene ahabábq suena Maniká awahbeh sansánire. ³Menahmé itega Sísa íre tagariáh kéga ahabábó serahnuowe. Menah itega mó kené ahre weh abariéq íre kaweq iwíáhéq píah narotaq múguwahgu agéq Manikáne ehweh anterueq péhepehe manikánsábé iwíáh iwíáh arítárowe.

⁴Amahnága Sísa íre tagariáh kéga mi ahabábq sánsámá míraotaq itega sereq moráráq íre miraonsabé sega áhtenéra itensabé íéhruruowe.

⁵Mókake Maniká anotah sáhsi anínká ehweh aritahnaraq sega irigue sene ahbabáqmari pahsuagéhe. Wega moke oga míáh kéreq pusa kéreq ehweh aitena sainsuanawire. ⁶Minayabe moke pukuro ke oga míáhtáq mó kegá Manikáne ehweh teri terinuwara írówe. Maniká oga mía mía inserahnigeheéra teriuwara írówe. Irera ahbabáq kega onserahnéra sinonka pukuwe.

We séhréh atéhoró i ehwéhne.

⁷Moke náneq parabagína tanáhráq aiq wahtonire. Kawerue púreronehboq tabasíwe méq tábúsoqme iwíáhoró. ⁸Kiotaiki sansá teiníboq íráhro. Moke Sísa tagaríáh ánímárí wensabé wensabé irutaboiratéhoró. Irutaboirinaraqmé mó anínká are ahbabáq atahnaraqmé arega íre iwíáhue ahreraq matiankehe.

⁹Maniká tagaríáh kégá iteba sirataq kawerue séhréh ariteq iru eyoyóue wenáwíoro. Mirairataqmé mi keyabé íre síéhuru arítáhro. ¹⁰We tagaríáh ké séhréh aritageheéna Manikánka itensabé arutaboiréna morání moránínue kaweq naneq ítááire. Kaweq naneq ítááinsabé wene sánsá kawerue sehgieq we séhréh atéhoró.

¹¹Manikánka, Néne ehweh terio atéh anínká wene ehweh tábúsoqme irarinkehe. Séhréh ariteh anínká Manikánka págege atahnana séhréh aritankéhe. Mirairataq tagehra kegá iwíáhéra, Sísa Karáhéne sansá aiq kaweq sansáne éra Manikánsabe iwíáh íwíáh atagéhe. We anotah anínéna áhnte págege aní mía míai puaq wensabé ahriahri iwíáh íwíáh atanéhe. Aiq miraoneheqmúne.

Sísa áwíoqnonserah ite moq íwíoqnagehe i ehwéhne.

¹²Néne iyahnabo ánímáríno, itensabé nirutaboiruge. Íre kaweq sunúq ite áhwáre tanahráq sínaraq áhteniyeho. Íre kaweq sunúq áhwáreh naneqka peh morá ínéba sire íwíáhiyeho. Írakaumo. ¹³Mó kegá Sísa Karáhé áwíoqnonserah ite íwíoqnehrataq iwíáh íwíáhoró. Minayabe wega tuinaraq itene irupipeq eyoyóinaq iwíáh íwíáhigehe. ¹⁴Itega Sísa Karáhéne sansá sehgiónsabé mó kegá íre kaweq ehwéh aitéhrataq iru ukiqme míáhro. Manikáne Awa págege kiotaiki anínéna iteba mía míai puaq iru eyoyóue míáhro.

¹⁵Mó aní subiq suewé, aebówé, ahkaragárawe, mina tahnsa ahbabáq íre miraoro. Íre itereq wehgaq mire pehragahro. Itega mina tahnsa ahbábárotaq mó kegá kamah aiémé minawé áhnte iyehiteh sansáne. ¹⁶Ite Sísa tagaríáh ké míáhnsabé mó kegá íwíoqnehrataq minawé íre iyehiteh sansáne. Mó kegá ite Sísa Karáhéne animárí móe aitáhnsabé iyehitegurégúiyehboq peh Manikánsabe iwíáh íwíáh atáhro.

¹⁷Ehweh aite tanahráq aiq sire. Mi tanáhráq ite Manikáne animáripá ebeq áhwáranáe. Anehemé Manikánka wene kaweq ehwéh anterúáh

ké ehweh aritena anotahtaq kamah arí mino. ¹⁸Minayabe Manikáne ehwehnka aiq mahraréna,

TábúSORÁH ké kawerariteyabe págege sansáne. Manikánsabe suwahrieh ahbábáq kéwé árahiro? Árahue kaweraritankehbo úwe.

(Gutpela Sindaun 11.31)

¹⁹Manikánka kowe aritahnara mó kegá íwioqnehrataq peh kaweq sansá miraéq Manikánsabe, Arensabé aiq pútare ateq arene sánsá sehgioneheqmúne teawéro. Teawirataqmé wega kawerue wahnahnaitankéhe.

Sísa tagariáh kéréq wahnahnarite ehwéhne.

5 ¹Sísa tagariáh kéréq wahnahno keo, ehweh teiníboq íratíáhiro. Íné moq Sísa tagariáh kéréq wahnahnu aní múge. Sísa Karáhé awankátaq éruwana pukútaq niuranka tagahwae. Wegá tuina tanáhráq kaweq naneq náiena anotah aní ména kawerue wahnahninkehe. Minayabe Sísa tagariáh ké kawerue wahnahnarítáhiro. ²Sipisípiq wahnáhnká wene kamári wahnahninserah ite moq Maniká tagariáh kéréq kawerue wahnahnarítáhiro. Wehukega pagu pagunonsabé mi arámbéhrí mirainie íwíáhiyeho. Peh Manikánka miraoro aitéhnsabé we tagariáh kéréq kawerue wahnahninie íwíáhoró. Mi arámbéhríunsabé ápeq meyaníe íwíáhiyehboq peh mi arámbéhríyábé irutaboírue miraoro.

³Mah marákóipéqté wáhnáh kégá págegeue wahnahno serahniyehboq pehwehrue méq kaweq sansánirataq itega wahnahnarítáh kégá tagéra sega moq pehwehrue méra kaweq sansánigehe. ⁴Mirairataq kiotaíqme wahnáh tuinaraq wega itensabé, Kawerowe aitankéhe. Mi tanáhráq wega náina naneq íre parabagia peh ahriahri kagainawire.

Manikánka píribahri ke íre séhréh aritankéhe i ehwéhne.

⁵Mahbigaunseq o menahwénsónsero, Sísa tagariáh kéréq wahnahno kené ehweh íráhiro. Ite ómi píribahri sansá sueq mó kené ehweh ireq we séhréh atéhoro. Minayabe Manikáne ehwehnka mahraréna,

Sensíwíq pankeráh kéwé Manikánka íre séhréhia peh ahqáho arítéhre. Sensíwíq íre pankeráh kéwé Manikánka séhréh arítéhre íre.

(Gutpela Sindaun 3.34)

⁶Minayabe iteitene iuwahbeh iwíáh sueq Manikánsabe, Wahnahnainte séhréh ainto teawírataq wewega iwíáhína tanáhráq anotah aní míahno aitankéhe. ⁷Wega itensabé arutaboiraitéh púaq moke ite iwíáh kikiro naneq teawéro.

Owainawansabé anotahtaq ahqáho atáhiro i ehwéhne.

⁸Itene naruo anímé owainawane. Anotah pusí tahnsa kanká wah pawe nanieéna ahkabaqmena nogínserah wega wehuke ahbabáq aitanieéna

ahkabaqmena nogíre. Minayabe áwéh panantágínaq tagaríáhiro.

⁹Sísansabé aiq pútare ateq owainawansabé anotahtaq ahqáho atáhiro. Ite tagarionawe íre itebataq moke mah marákóipéq Sísa tagaríáh ké moq síwíoqnehrara siru umehire. Owainawanka íwíoqnáhnaraq minayabe iwíáhéq wensabé ahqáho ata ataoro.

¹⁰Ahriahri Sísa Karáhéreq oga mérapeq mía míageheéna Manikánka itensabé arutaboiréna omaq itowe. Manikámé áhnte séhréh aitéh áníne. Minayabe wahto tanahráq iru umeh agínana Manikánka ite kaweqtaq míageheéna anotahtaq págege aitankéhe. ¹¹We ahriahri págegeue kiotaigme aní mía míaire. Ai q pútaq ehwehne.

Páhsi parabaginai ehwéhne.

¹²Sísa tagaríéh ání wenáwíq Sáírae. Íné tagaríómé wega Sísane sánsá kawerue sehگیرe. Mah kariq páhsí sehiraninie ugana wega íné séhréh aintéhre. Ite kaweq iwíáh aitanieéna Manikánka séhréh aitéh éhwéh sehiranue teiúge. Wene aiq pútaq sansá kawerue sehگیرó.

¹³Pábíróni suwahpeqte Sísa tagaríáh kégá itensabé iro ro ewe. Manikánka se moq omaq sitowe. Náníbáq Máhkaga moq itensabé iro ro ire. ¹⁴Moke mibeqté Sísa tagaríáh kéyábé irutaboiréq we mehweh atéhoró.

Ite Sísa Karáhéreq mía míao puana Manikánka iru ukiq itéhre.